


DS
287
L48A2
1905
V.7



EAST ASIAN LIBRARY
UNIVERSITY OF TORONTO LIBRARY
130 St. George Street
8th FLOOR
TORONTO, CANADA M5S 1A5



宋李忠定公奏議選卷之十三

明 皖桐左光先羅

宗人李春熙皞如輯

宋 李綱伯紀著


筠陽戴國士初士較

宗裔李嗣玄評定

論淮西軍變劄子

紹興七年公在江西

臣據舒蘄江黃州探報酈瓊叛逆擁淮西全軍并都督行府廬州官吏兵民等盡歸僞齊沿江州郡人情惶駭此誠不測之變朝廷措置失當深可痛惜者也臣請爲陛下條陳之劉光世治軍素無紀律遇敵輒



避衆所共知、不爲無罪、然其所部軍馬、皆陝西西蕃
部落、招降巨盜、及簽軍漢兒渤海之流、最爲龐雜、烏
合、光世御之以寬、頗得其心、平時不至散叛、已爲不
易、去冬賊騎侵犯淮西、光世初雖左次以避敵、終能
返旆而成功、朝廷因而撫用、激勵士氣、亦足控敵一
面、乃輕從其請、罷兵柄而授閑散、將士缺望、遂生攜
貳、此措置失當者一也。旣罷光世帥權、卽當預選武
臣之有威望智畧者、以爲之代、使將士悅服、人無間
言、則一軍安矣、乃遣呂祉以參謀總師、分守不正、不
足以蒞軍事、名望素輕、不足以厭衆心、號令賞罰、亦

有不合其宜者、馴致變亂、豈無自而然哉、昔人有云、
每一發兵、頭鬚爲白、此言用兵之難也、祗以書生、驟
得官職、意謂功名可以唾手而取、輕當委寄、智小而
謀大、力小而任重、坐使叛將得成其姦、此措置失當
者二也。王德鄴瓊在光世軍中、皆號梟將、德以嚴猛
失士心、瓊以姑息得衆情、平時已不相能、易帥之後
自當分置他軍、以絕間隙、乃使共事、以成忿爭、呂祉
又不能駕御而調和之、宜其生變、此措置失當者三
也。初光世一軍、老小盡寓太平宣城、將士進屯廬壽
限以大江、足以繫累其心、非小補也、自今夏經火災、

之後、乃悉徙居江北、以此悅衆、而不知有攜手同歸之虞、術亦疎矣、此措置失當者四也。王德擅離職守、奔歸行朝、正當權時之宜、歸罪于德、械繫有司、遣使撫存軍中、喻以禍福、必有忠義奮發、安衆而解紛者、衆情旣安、瓊必遁逃、借有從者、不過部曲耳、審喻鄰境諸帥、出兵遮截、邀擊於要害之地、瓊必成擒、不務出此、而急置宣撫制置使副、臨以重兵、是趣之使去也、生靈遭屠戮、官吏被驅擄、數萬之衆、一朝失之、誰任其咎、此措置失當者五也。軍旅機會、間不容髮、措置一失、禍患隨之、而況五乎。深可痛惜、試畢其說、自

艱難以來所乏者兵西地將士尤爲難得以百金募一卒以萬金養一士未足爲多十年之間疾病死損所餘幾何今一旦而亡數萬之衆棄撫育之恩歸仇讐之境此深可痛惜者一也。舍我歸彼賊勢益張朝爲君臣暮爲仇敵如李成孔彥舟閔師古輩我不能有反爲賊用致死於我可可悲乎。酈瓊將士備知東南曲折秋高馬肥爲之鄉道以擾江淮寧不可慮此深可痛惜者二也。朝廷屯重兵於江淮以爲藩籬仰此一軍控制廬壽盡卷而去藩籬決矣何以補之折東補西愈見疎闊姦逆窺伺強暴憑陵喪威辱國自

取予侮。此深可痛惜者三也。近季議戰士氣稍振。去冬累捷。國勢浸強。將定恢復之謀。漸成中興之業。而以措置失當之故。亡此全軍。使忠臣義士。扼腕憤歎。此深可痛惜者四也。此端一啓。人各有心。後來將帥。何以號令。此深可痛惜者五也。書曰。雖悔曷追。語曰。旣往勿咎。此雖措置失當。深可痛惜。然旣往之事。不可復追。臣願陛下鑒前失。以圖將來而已。所謂鑒前失。以圖將來者。降罪已之詔。痛自追咎。以收人心。一也。謀善後之策。益務持重。以固國勢。二也。增宿衛之兵。以備不虞。三也。採耆哲之言。而勿偏聽。四也。堅聖

心之守。而勿輕變。五也。遇變而懼。修省以應之。其說固多。然在今日。莫先於此五者。昔明皇幸蜀。中道將士有散叛之心。明皇下哀痛之詔。諭以誠意。衆志乃定。德宗遭奉天之變。所降詔令。武夫悍卒。聞皆感泣。卒復京師。故陸贄有言曰。動人以言。所感已淺。言又不切。人誰肯懷。所謂降罪已之詔。痛自追咎。以收人心。在今日爲不可後也。天方艱難。深闕成功之所。正如逆風行舟。用盡氣力。不離本處。兩年以來。經營恢復。蓋亦勤矣。然卒未能收尺寸之功。今一朝以措置失當之故。人心攜離。士氣凋喪。豈可不相時之宜。暫

輟攻取之謀、且爲固守之計、靜以待之、俟人心漸寧、士氣復振、然後可以行師、順時而動、以迄天誅、所謂謀善後之策、益務持重、以固國勢、在今日爲不可後也。天子所居、上憲乾象、紫微之宮、三光之廷、皆有藩垣、以拱衛宸極、行幸之所、尤宜嚴備、以待非常、今陛下巡幸省方、駐蹕建康、而禁衛單弱、朝廷初不留意、近聞楊沂中、劉錡、皆以殿前中軍、及侍衛馬軍司兵、出戍淮甸、外重內輕、誠可寒心、肘腋倉卒、何以待之、明受之變、商鑒不遠、所謂增宿衛之兵、以備不虞、在今日爲不可後也。昔秦穆公歸自崤、作書以自誓、其

言曰、尚猶詢茲黃髮、則罔所愆、又曰、如有一介臣、斷
斷猗無他技、其心休休焉、其如有容、人之彥聖、其心
好之、不啻如自其口出、寔能容之、以保我子孫黎民、
亦職有利哉、夫黃髮之臣、其經歷久、詢之則利害必
審、好善之臣、其忌嫉少、容之則薦進必多、方召以元
老壯猷、而興周、房杜以持衆美、效之君而興唐、職此
之繇也、夫專任乃能成功、而偏聽亦能致亂、顧所以
聽任者、何如耳、漢唐之初、以專任興、秦隋之季、以偏
聽亡、是以堯舜之世、任賢勿貳、任欲專也、明目達聰、
聽欲廣也、方今虜僞鴟張、將士離散、天下危於累卵、

陛下得不廣聰明爲扶顛持危長久之計乎所謂採
耆哲之言而勿偏聽在今日爲不可後也自古創業
中興艱難之際叛將不能無也在高祖時有若盧綰
陳豨在光武時有若劉寵盧芳在太宗時有若輔公
柘王君廓德宗奉天李懷光叛之肅宗靈武康楚元
張嘉延叛之晉遷江左蘇峻祖約叛之惟能因時制
變旋即討定故不足爲患今淮西一軍數萬之衆一
旦叛去固不爲小變若能應之於後亦未足爲吾害
也或謂虜僞得吾叛將因而用之決須深入建康去
淮南不遠勢恐難安是不然韓世忠兵屯淮東張俊

楊沂中、兵屯淮西、岳飛兵屯上流、不下數十萬人、又有長江天塹之險、若能撫綏將士、措置合宜、雖令得所、賊馬豈敢深入、倘以一時之變而議退避、則車駕一動、大事去矣。所謂堅聖心之守而勿輕動。在今日爲不可後也。帷幄之謀、必有勝筭、愚臣私憂過計、不識忌諱、激於忠憤、忘生觸死、冒進狂瞽、然臣聞天地之變、不足爲災。人不盡言。國之大患。侍從者。獻納論思之官也。臺諫者。耳目腹心之寄也。今侍從臺諫以言爲職。類皆毛舉細故。以塞責。所論不過簿書資格。守倖令丞除授之失。當。至於國家大計。係社稷之安。

從臺諫
公之少
以不能
不玄帥
位也

危。生靈之休戚者。初未聞有一言及之。陛下試察如
淮西之變。侍從臺諫之臣。亦有見危納忠。爲陛下言
之者乎。大臣懷祿而不敢諫。小臣畏罪而不敢言。此
最今日之可憂者。臣以憊愚。夙荷睿獎。每思竭盡。以
報大恩。第以人微跡疎。無階自致。遇事輒發。罪當萬
死。伏望聖慈。哀憐孤忠。留神聽覽。倘有補於萬分之
一。雖死之日。猶生之年也。塵瀆天聰。臣無任惶懼待
罪之至。

小帖子

臣續據探報。鄺瓊驅擄官吏兵民老小。凡二十

餘萬人北去、兵部尚書都督府參謀等、
并帥臣等、並爲所執、統制官喬仲福、張景、劉光
時等死之、此豈小變、未聞朝廷別有處畫、臣以
疎遠、初不敢論列、再三思之、當艱危之際、仰荷
重恩、嘗蒙詔許令入告、若不盡言、實負陛下、然
臣前件劄子、指陳朝廷措置失當、憂憤所激、情
迫言切、難以復處藩方、已別具奏聞、乞賜黜責、
或簡會累奏、除一在外宮觀差遣、以安愚分、伏
望睿察、臣近准都督府劄子、招收淮西回易官
兵、已差都承旨張宗元前去措置、臣竊以宗元

之行、何異於呂祉、更望聖慈、詳酌淮西軍事、只委制置使楊沂中爲便、伏乞睿察、

中興方有其端而酈瓊忽叛士氣沮喪真可痛惜然岳韓張楊精兵不下數十萬勢猶足以自固何至惘疑虛喝遽自退屈方其幸建康圖恢復規模氣象真足有爲曾幾何時虜使與王倫偕來遂以詔諭江南爲名竟隱忍受之而不知愧何強弱相尋之遽也所謂主和議者惟觀一有蹉跌以售其說忠定公之言于是乎驗矣

劉光世軍無紀律遇敵輒避議者乃與岳韓並稱何不倫也

呂祉雖智不足以御變使瓊得叛去然被執至僞境能下馬罵賊竟死國難其節槩有足稱者

拯耆哲之言而勿偏聽聖心之守而勿輕變是救時急着天地之變不足爲災人不盡言國之大患是千古至言

李又玄評

奏陳利害劄子

臣近者不量短淺、輒冒萬死、條陳淮西叛將利害、仰
瀆天聰、夙夜靡寧、以俟嚴譴、伏蒙聖慈、旣赦狂瞽、又
降璽書、特有褒諭、感戴大恩、非臣糜捐所能報稱、然
臣竊見都進奏院報、張浚罷相、以言章落職、宮觀、淮
西之變、浚實有罪、責罰之加、其誰曰不宜、但言者引
漢武誅王恢事以爲比、臣愚竊以爲不然、試爲陛下
陳之、昔王恢設馬邑之謀、欲誘匈奴擊之、事旣不諧、
武帝以造兵謀、本出恢、動大衆而無成功、不誅無以
謝天下、遂下恢廷獄、此武帝之過舉、非盛德事也、何

則勝負兵家常勢。顧規略何如耳。易象有左次、無咎之言、兵法有善敗不亡之戒。詎以一失遂害大計哉。觀秦穆之用孟明、弇賜於三北之餘、光武之用馮異、收功於桑榆之際、則知武帝之誅恢、未爲無失也。今浚之罪、乃在於志廣才疎、力小任重、不能諮諏良策、而專於自用、不能輯睦將帥、而輕務改移。遂致士卒攜離、捨我就敵。以此罪浚、夫復何辭。若以王恢爲比、咎其始造兵謀、則是因噎廢食、懲羹吹鑿、以細故而搃大計、恐非策之得也。方今強虜憑陵、僭逆窺伺、國勢未定、人心驚疑、若不注意治兵、以爲自強之計、則

何以安宗社、保生靈、固邊疆、禦外侮、徒以措置一失之故、遂欲盡棄前日之所爲、歸罪于始造兵謀者、臣恐智謀之士、卷舌而不言、忠義之臣、扼腕而無所發憤、將士解體而不用命、州郡望風而無堅城、陛下將誰與立國哉。且今日朝廷之勢固自若也。襟帶江淮、保據荆襄、連接川峽、韓世忠、張俊、岳飛、吳玠之軍、分屯要害、不下數十萬人、兵未爲弱、去冬敗劉麟、劉猷之徒甚衆、用兵未爲不利、倘因淮西之變、益自懲創、審號令、明紀律、徙諸軍家屬於江南、以便糧餉、教戰艦水軍於淞江、以備不虞、姑輟進取之謀、且爲固守。

之計。和協輯睦。靜以待之。使國勢漸定。人心漸安。士氣漸振。乃可徐議恢復。不察此理。經變故而亟動搖。使外寇得以乘其間隙。譬猶奕碁。前著旣差。後著復錯。是謂自敗。欲求勝敵。不可得也。臣頃年嘗因賊馬入寇淮甸。獻陳愚計。以謂退避之說。不可行於今。何哉。前之爲寇者。金人也。利於擄掠。得所欲卽還師。今之爲寇者。僞齊也。利於土地。得一郡則守一郡。得一邑則守一邑。翠華退避之後。將士奔潰。賊勢鴟張。將安所定止哉。誤蒙採擇。特降褒詔。今日之說。亦猶是也。伏望陛下。堅聖心而勿動。修軍政以自強。無爲趣。

時獻言者之所搖。古語曰、臨大難而不懼、聖人之勇也。惟陛下留神幸察、夫張浚措置失當、誠有罪矣。然其區區狗國之心、有可矜者。願少寬假、以責來效。昔漢高祖用兵、喪師跳身走者屢矣。然卒與成功者、皆舊臣也。借使每敗必逐、則張良陳平之流、不勝其誅矣。臣前所論淮西事宜、指陳浚措置失當、非黨浚者。今此論奏、亦非爲浚游說也。因言者引王恢造兵謀之喻、深恐退避講和之議復出、以眩惑聖聽、則大事去矣。宗社安危、自此而分。故敢披露肝膽、冒昧有言。死有餘罪。臣以衰病累請宮祠、未奉俞允、邇來犬馬

之疾益深、將填溝壑、已別具奏乞骸骨、以歸山林、貪
戀明時、何可言喻、愛君憂國之志、雖在畎畝、豈敢弭
忘、伏望陛下哀而憐之、干冒天威、無任惶懼戰越之
至、

王恢設馬邑之謀、無故而挑強敵、漢武誅之
是也、若金虜則破、汴都劫二帝、辱六宮、奴舉
族、自有天地以來、中國之辱、未有甚於此者、
此而不注意治兵、一洗振古所無之耻、則何
以自立於天下、臣民之上耶、王恢有罪、無功
張浚功浮於罪、忠定第欲深明浚、不宜弃故
不得、不以王恢之誅爲失策耳、
言者之罪、浚意不在浚也、欲借浚而以退避
講和之說進也、公之救浚、亦意不在浚也、惟
恐其因浚而使退避講和之說行也、
以漢高喪師、屢跳不歸、罪良平爲喻、極確
李又玄評

奏陳車駕不宜輕動劄子

臣近因上疏論淮西事宜、嘗獻狂瞽、竊謂車駕不宜輕動、當靜以待之。諸將重兵、不宜抽回、正當分屯要害。益爲自固之計。妄意及此。其說畧而未詳。今聞朝廷以梁汝嘉知平江、荆蓋營屋萬餘間、及召張俊楊沂中、全軍還駐建康、如此、則是移蹕之謀、抽回軍馬之計、皆審於所聞、宗社安危、生靈休戚、繫此一舉、敢冒萬死、爲陛下詳陳之。臣聞自昔用兵、以成大業者、必先固人心。作士氣。據地利而不肯先退。盡人事而不肯先屈。是以楚漢相距於滎陽、成臯間。高祖雖屢

敗。不肯退尺寸之地。旣割鴻溝。羽引而東。遂有垓下之亡。曹操袁紹戰於官渡。操雖兵弱糧乏。苟或止其退師。旣焚紹輜重。紹引而歸。遂喪河北。繇是觀之。今日之事。豈可因一叛將之故。望風怯敵。遽自退屈。果出此謀。六飛回馭之後。人情動搖。莫有固志。士氣銷縮。莫有闔心。虜僞乘之。誰爲陛下堅守苦戰。以禦大敵者。且建康去平江。無數百里之遠。非有高山大川。以爲限隔。健馬疾馳。數日可至。徒有怯敵之名。無益退避之實。建康有長江天塹之險。不能固守。何有於吳會哉。聲勢所逼。退而之臨安。又退而之會稽。又退

言道破
神見

而之閩粵極矣。我遐彼進。使賊馬南渡。得一邑則守一邑。得一州則守一州。得一路則守一路。亂臣賊子。黠吏姦氓。從而附之。虎踞鴟張。雖欲如前日。返駕還轅。復立朝廷於荊棘瓦礫之中。不可得也。偷取目前之安。不顧異時噬臍之悔。非策之得者。借使虜騎衝突。不得已權宜避之。猶爲有說。今幸疆場未有警急之報。兵將初無不利之失。朝廷正可懲往事。修軍政。審號令。明賞刑。益務固守。而遽爲此擾擾。棄前功蹈後患。以自趣於禍敗。豈不重可惜哉。臣故曰。車駕不宜輕動。正當靜以鎮之者此也。臣又聞自昔有江表

者。必以淮南爲藩籬。屯重兵於江北。然後江南可安。六朝相繼數百年。雖符堅石勒宇文拓跋之盛。不能陵踐。凡以強藩巨鎮。盡列淮上之故。後唐李氏有淮南。則足以保國。旣失江北。國勢遂卑。繇是觀今日之事。豈可因一叛將之故。悉罷屯戍。遂欲棄置於度外。張俊旣去盱眙。楊沂中又去廬壽。李宏獨以千兵守之。使賊挾叛將以來。則廬壽必不能守。前日酈瓊之叛。屋宇倉廩。置而不焚。豈無深慮。使賊得據合肥。則舒蘄光黃一帶。無兵可禦。決須退保。是賊無亡矢遺鏃之費。以談笑而下淮西也。一失淮西。與之共長江。

之利。江南可得無患乎。州縣無備。人情震駭。一患也。鹽貨不通。糧餉皆阻。二患也。濟渡多端。難以控扼。三患也。時出兵以擾我。疲於奔命。四患也。得吾州縣。蟬結蟻聚。水草有依。遂爲吾之痼疾。五患也。昔人有言。長江千里。當備者不過數處。如人一身。腠理爲急。淮西者。今之腠理也。賊馬入寇。必趣廬壽。前日以劉光世全軍數萬人守之。猶懼不濟。今乃無兵。是委重地與敵。以爲背脇疽根。豈不重可惜哉。臣故曰諸將重兵。不宜抽回。正當分屯要害。益務自固者此也。前日劉光世一軍。以措置失當之故。將士攜離。捨我歸敵。

非細故矣。萬一因此翠華移蹕。將士召還。以致不可勝言之患。是措置之失。又非前日之比也。昔人有言。動不詳思。輒喜言誤。誤不可數也。臣觀朝廷自建炎以來。每失機會。其誤多矣。譬猶奕者。前著雖差。後著猶可救也。著著皆誤。何以取勝。傍觀者得不爲之寒心。臣愚竊思所以爲今日計。願陛下深體漢祖之用。心堅忍。而勿輕變。非有大警急。姑少安之。丁寧訓戒。三四大臣。益置所以自固之策。遣張俊全軍。進屯廬壽。而存其家屬於建康。以便糧餉。命韓世忠兼保盱眙。而留楊沂中以衛行在。詔岳飛分屯江池。以保上

流。沿江有備。則國勢亦粗定矣。前日荆造車船戰艦。所費不貲。初不聞置軍教閱。將安用之。謂宜收拾於建康上流州縣。如太平江池等州。蕪湖繁昌湖口等縣。擺泊。仍於江湖間。募習水善游者。萬餘人。刺手背爲水軍。差官統領。分隸教習。使金鼓旌旗。上連下接。以備緩急之用。則賊騎雖熾。亦豈敢遽窺江右哉。使今冬防守無虞。則人心自安。國勢益固。可以徐圖善後之策。捨此不爲。而但務退保。臣未見其可也。抑臣聞之。書曰。民非后罔戴。后非衆罔與守邦。又聞之。孟子曰。保民而王。莫之能禦。天子作民父母。必有保民

之心、然後衆心忻戴。如子之保父母。此上下之所以能相固也。蜀先主去荊州、從之者數萬人、曹操逐之、或勸捨衆而速行。先主曰、衆人從我、豈忍棄之。說者謂其有帝王之度、區區偏霸之主、猶如此、而況於天下之君乎。臣願陛下以保民爲先、則雖弱必強、中興之業不難致矣。臣以愚拙、每進狂直之言、必蒙褒納。有君如此、其忍負之、故敢於艱虞之時、復進苦口逆耳之說、言或可採。願陛下與三四大臣、熟議利害、斷而行之。庶幾有補萬一。徒能容納而不用、無益也。昔漢高祖開濟大業、非無張良、陳平之臣。出奇畫策、動

必有功。然勸爲義帝伐項羽者三老董公也。勸出武
關置軍宛葉者轅生也。勸都關中者婁敬也。勸以親
子弟王齊者田肯也。必有衆謀。乃能有濟。今臣以孤
陋遠在千里之外。每有所聞。輒獻臆說。仰禪廟謀。尚
庶幾於數子。伏望聖慈。赦其罪而取其忠。天下幸甚。
用兵以作氣爲主。據地利而不肯先。退盡人
事而不肯先。屈是千古用兵第一義。當時疆
場非有警急之報。徒以一叛將之故。虛弦自
驚。望風退屈。此何爲者。甚矣闇君之不足與
有爲也。
淮南者江南之屏蔽也。屏蔽固而後江南可
都。自六朝已然矣。然我國家定鼎金陵。宿重兵
於池河。而留都諸衛半在江北。亦是此意。乃
無故而撤張浚楊沂中之兵。是自撤其藩而
與仇敵共長江之險也。其可乎。

以保民爲先是王佐之言以良平推廟堂而以董公轅生輩自比得進言之法又玄評

條具防冬利害事件奏狀

契勘臣近累具奏聞以衰老疾病乞罷帥權除一宮觀差遣或許守本官致仕伏蒙聖慈降詔不允仍令依累降指揮不得再有陳請感戴天恩涕泗橫集臣雖衰病敢不龜勉自力用忘疾憊以圖報萬一然臣所管江西一路實爲上流輔翼建康駐蹕之所蔽障閩廣接連荆湖自江以北控引淮西去僞境不遠豫章九江興國三郡縣地千餘里皆係要害去處虔吉筠袁等州素產盜賊蜂屯蟻聚千百爲群不可勝計

而自近年以來、帥司所統軍馬、盡爲諸將之所兼并、
器甲錢糧、席卷一空、臣到任之初、蒙朝廷差到中世
景一軍、纔千餘人、比因盜賊猖獗、又蒙指揮添差李
貴步諒軍馬、人數不多、仰賴朝廷威靈、兩年之間、招
捕群盜、凡數十夥、幾數萬人、逆者誅鋤、順者惠來、幸
悉寧謐、惟是防冬、以捍大敵之具、闕然未備、誠可寒
心、近日探報虜僞增兵、駐陳蔡潁昌臨汝諸郡、與舒
蘄光黃對境相望、間遣步騎渡淮作過、初無重兵可
以捍禦、九江興國、浚江一帶、又無精卒、爲之控扼、新
經鄺瓊之變、藩籬疎缺、人心動搖、萬一虜騎奔衝、有

南牧之意、何以待之、今年防冬、非去年比、而本路空
虛、軍馬單弱、與去年無異、如臣一介書生、蹤跡孤遠、
豈敢虛任重責、積憂成疾、恐誤國事、屢此乞身、非得
已也、今者旣蒙聖恩、未忍棄捐、尚使待罪藩友、以備
驅策、自非接誠、控告、君父、洞照幾微、審量事勢、摘那
兵將、假以權宜、使得竭犬馬之力、圖尺寸之補、則何
以仰副使令、庶無罪悔、敢陳愚懇、冒瀆天聰、伏望聖
慈、曲賜矜察、特從所請、所有防冬合行事件、謹畫一
條具下項、

一本路或有賊馬侵犯、理當隨宜措置、倉卒緩急、

之際、有難待奏報者、欲乞一切防冬事件、特許臣以便宜施行、訖奏聞、

一本路元置安撫制置大使司、差兵二萬人、近年撥付都督府、及分隸諸將、湍奔矢往、並無留者、雖蒙差到申世景、李貴步諒、軍馬人數不多、又以虔吉筠袁等州、盜賊殘黨之故、分屯彈壓、不可輟那、目今防冬之際、勾集使喚、全然缺乏、夫以一路十餘州數千里之地、與敵相隣、日夜窺伺、防守之職、責在帥司、而不畀以重兵、徒有其名而無其實、雖使廉頗李牧爲帥、亦不能有所

施設而欲付一衰病書生、使之談笑却敵、安能有濟、倘或兵將足用、使令不乏、臣雖不才、殫竭駑鈍、臨機制變、庶幾尚可爲朝廷獨當一面、以保上流、不能則繼之以死、所甘心焉、使無兵將、虛受重責、則一死雖小、臣實惜之、至於敵至而避、懷印遠遯、但爲身謀、不爲國計、則非臣之素志也、伏望聖慈、特降睿旨、差撥可用軍馬五七千人、與見管之兵、相兼使喚、庶幾不致誤國、方今朝廷新失淮西之兵、非不無缺乏兵將、然摘那應副於當用之處、有不可已者、伏望留神幸

察、

一本路江州最爲重地、自昔六朝皆屯大兵、擇名臣以居之、吳則陸遜、東晉則溫嶠、陶侃、誠以控扼上流、不可與他郡比也、今方車駕駐蹕建康、九江尤爲要害、雖嘗降旨、令岳飛分兵屯泊、至今未聞有至者、夫兵貴合不貴分、此特兵家常勢、至於要害之地、當分兵控扼、使敵人不敢窺伺、所謂先人有奪人之心、豈可執一哉、近年九江爲馬進所據、朝廷遣大兵攻討、幾半年、僅能克之、今舒蘄光黃、並無捍蔽、使虜騎奔突、占據

九江則江東西必大震擾其爲患非淺淺也伏
望聖慈特降親筆趣飛分兵疾速依近降指揮
屯駐江池以固上流之勢事不可緩

一東北流移之人布滿江西其間多少壯可用者
無業可歸迫於饒寒類多失所朝廷近降指揮
令招充闕額禁軍誠爲得策然必令刺填洪州
軍額一隸軍籍卒無脫期非人情所樂遂致無
願就者深慮轉徙溝壑或流爲盜賊誠可矜憫
伏望聖慈特降睿旨許令招充義兵只刺手背
日加訓練聽本司使喚所有錢糧本司自行應

副支給候過防冬具人數申取朝廷指揮實爲
利便

貼黃

臣契勘建炎二年虜騎自武昌渡江侵犯江西
當時但爲退避之計、官省旣行、帥臣亦遯、兵民
莫有統率之者、遂致洪州殘破、最爲慘酷、撫
筠、袁皆被其害、紹興元年、李成馬進占據九江、
自筠及洪、賊勢猖獗、朝廷遣張俊統重兵以破
之、賊馬遠遯、保全一路、以至今日、繇是觀之、退
避之與進討、其效可見、今本路自兵火之後、六

七年之間、涵養休息、漸復承平舊觀、萬一虜僞
乘間南牧、欲遑避則不可、欲進討則無兵、不知
朝廷使臣何以處之、委一路生靈、及財賦根本
之地、置而不恤、使虜僞得以占據、未見其可也
若謂賊未必來、及淮上有兵、如去冬之捷、雖來
未必能南渡、皆出僥倖、豈可數哉、如臣畫一所
陳、皆防冬所不可闕、及審度朝廷可以應副者、
方敢冒昧以聞、伏望聖慈、與三四大臣、熟議早
降指揮、如朝廷以爲不必遣兵、實難虛受重責、
乞簡會臣累奏所乞、或先黜責施行、伏望睿察、

所謂虜騎犯江西宮省既行帥臣亦避者蓋以金人入寇高宗命津遣六宮及奉元祐太后如江西元末知太后在洪州遂趨江西劉光世屯江州日置酒高會金人渡江無知者虜薄城下光世引兵還屯南康金人入江州遂繇大冶趨洪州太后聞警出城而江西制置使王子獻弃城走金人遂陷臨江筠袁撫吉等州太后及潘貴妃以農夫肩輿走虔州僅得免金人遂還屠洪州慘酷極矣夫江西內地也使九江咽喉之地劉光世能固守勿失點虜豈能蹂躪至此乃使六宮流離數州糜爛光世失律之罪其足誅乎後世乃與岳韓並稱不亦辱忠貞而羞格天之烈哉此論世者之所以必考其實也 李又玄評

謝提舉臨安府洞霄宮表

臣綱言、伏奉勅命、除臣提舉臨安府洞霄宮、已望闕謝恩、祇受訖者、分闡踰年、莫著蕃宣之效、奉祠得請、

曲蒙保護之恩、感涕無從、兢慙罔措、謝中伏念臣誤膺

器使、素乏材能、徒有憂國愛君之心、曾無週身防患
之術、囊封上達、每罄愚衷、函詔俯頒、屢叨睿獎、夫何
抵忤、自取悔尤、積有煩言、愧瀆盖高之聽、事無實狀、
難當溢惡之辭、豈敢辯明、但祈照察、茲盖伏遇皇帝
陛下、以慈爲寶、體道宅心、推善貸之深仁、廓納汙之
宏度、致茲盛德、施及孤蹤、臣敢不省循、致謗之繇、克
謹保身之戒、攀援望絕、方屏跡於山林、祝頌情深、願
憑因於香火、

宋李忠定公奏議選卷之十四

明 皖桐左光先羅生選

宗人李春熙

如輯

宋 李綱伯紀著

筠陽戴國士初士較

宗裔李嗣玄評定

論使事劄子 紹興八年時公退居長樂

計字三十五
十五

臣竊見朝廷遣王倫使金國、奉迎梓宮、往返屢矣、今者倫之歸、與虜使偕、乃以詔諭江南爲名、四方傳聞、無不駭愕、何者、兩國通使、講好、息兵、以禮爲先、自敵以上、無所不用其至、禮之經也、今乃不著國號、而曰

江南不云通問而曰詔諭此何禮也宋有天下幾二
百年祖功宗德以聖繼聖聲教溢于四表炎運中微
夷狄亂常馴致靖康之變國祚幾絕賴陛下總師大
河之北入繼大統群臣推戴克受天命履大寶臨萬
邦爲神民萬物之主一紀于茲矣敵人遣使乃敢命
名如此自古夷狄陵侮中國未有若斯之甚者原其
所自皆吾謀慮弗臧不能自治自強偷安朝夕無久
遠之計群臣誤陛下之所致也臣請試爲陛下詳言
之方靖康末金人破都城毀宗社逼二聖鑾輿以北
遷易姓建號而陛下應天順人光復舊業自我視彼

則仇讐也。自彼視我。則腹心之疾也。豈復有可和之理。然而朝廷遣使通問。冠蓋相望於道。卑詞厚幣。無所愛惜者。正以二聖在其域中。爲親屈已。不得不然。猶有說也。至去年春。兩宮凶問既至。陛下抱哀銜恤。創鉅痛深。雖未能躬率六師。以報不共戴天之仇。猶當寢罷使者。絕不與通。以正仇讐之名。慎固封守。選練將帥。以爲自保之計。觀釁待時。動必有功。傳曰。名其爲賊。敵乃可服。欲正仇讐之名。以張恢復之本。正在此時。而朝廷失策。復遣使以迎梓宮。亟往遙返。帑藏爲虛。不得其要約。今者虜使荐至。乃建詔諭之號。

公肆陵侮。不知朝廷將何以應之。夫奉迎梓宮。乃陛下孝思罔極。在人情不得不如此者。然金人狡獪。動出計謀。我以誠求彼。以詐應。借此爲重。成其姦心。不知朝廷何所憑信。臣恐墮其計中。禍難未艾也。臣聞忠信爲周。古者遣使。以忠信爲主。故小雅於皇皇者華。君遣使臣之詩。諏謀度詢。必以周爰爲言。使不忠信。爲國之患。非淺淺也。彼王倫何爲者。市井駟儈之本。左右賣國之伍。三尺之童。皆知其不足信。而朝廷信之。此必有欺言。以中朝廷之欲。臣恐聽虛詞而受實患。如楚之信張儀。以求商於之地也。且倫使事初

以奉迎梓宮爲指。而虜使之來。乃以江南詔諭爲名。循名責實。已自乖戾。則其所以問朝廷而生後患者。不待詰而可知。臣在遠方。雖不足以知其曲折。然以愚料之。虜爲此名以遣。其邀求大畧有五。必降詔書。欲陛下屈體降禮以聽受。一也。必有赦文。欲朝廷宣布頒示郡縣。二也。必立約束。欲陛下奉藩稱臣。稟其號令。三也。必求歲賂。廣其數目。使我坐困。四也。必求割地。以江爲界。淮南荆襄四川。盡欲得之。五也。此五者。朝廷從其一。則大事去矣。天子之令曰詔。臣下則以稟令受詔爲事。倘屈體降禮。權時之宜。以聽其詔。

令。則。君。臣。之。分。定。矣。君。臣。尊。卑。如。天。地。相。遠。降。尊。就。卑。以。天。爲。地。可。乎。其。不。可。者。一。也。天。子。之。恩。曰。赦。臣。民。則。以。遇。赦。該。恩。爲。幸。倘。朝。廷。宣。布。頒。示。郡。縣。則。天。下。知。朝。廷。之。勢。去。士。民。之。心。離。矣。其。不。可。者。二。也。履。至。尊。以。制。六。合。曰。天。子。謹。制。度。以。爲。諸。侯。曰。藩。臣。天。子。出。命。者。也。藩。臣。稟。令。者。也。倘。奉。藩。稱。臣。稟。其。號。令。則。事。不。在。我。而。國。勢。傾。矣。其。不。可。者。三。也。朝。廷。全。盛。之。時。歲。賂。金。人。百。五。十。萬。猶。不。能。給。遂。至。敗。盟。今。日。保。據。東。南。財。用。鮮。少。又。有。養。兵。之。費。日。益。窘。迫。而。欲。增。賂。以。求。全。蓋。亦。難。矣。其。不。可。者。四。也。淮。南。荆。襄。江。

滌之屏蔽也。四川天下之上流也。不能措置屏蔽。保
有上流。資天險。結人心。以爲固。而欲割要害之地。棄
民。以求安。必無之。理其不可者五也。金人變詐不測。
貪婪無厭。縱使聽其詔令。奉藩稱臣。其志猶未已也。
必繼有號召。或使親迎梓宮。或使單車入覲。或使移
易將相。或使改革政事。或竭取賦稅。或朘削土宇。從
之。則無有旣極。一不從。則前功盡廢。反爲兵端。以爲
權時之宜。聽其邀求。可無後悔者。非愚則誣也。使國
家之勢單弱。果不足以自振。不得已而爲此。固亦無
可奈何。今土宇之廣。猶半天下。臣民之心。戴宋不忘。

與有識者謀之。尚足以有爲。豈可忘祖宗之大業。生靈之屬。望弗慮。弗圖。遽自屈服。祈哀乞憐。冀延旦暮之命哉。昔少康以一旅之衆。祀夏配天。不失舊物。光武騎牛從軍。殺新野尉。然後得馬。率烏合三千。破尋邑百萬。遂定中興之業。晉保江左。財用匱乏。王導至身衣疎布。誘善賈以濟國用。卒延國祚百有餘年。今朝廷事力。雖不足以望全盛之時。然將士如雲。帶甲之卒數十萬。士馬之盛。豈不過於少康光武。穀粟金帛。運漕不絕。舳艫相囘。財用之多。豈不過於東晉。有可用之資。而陛下又有過人之聰明。何憚不爲。而欲

此。面。以。事。仇。讐。其。受。此。屈。辱。也。夫。自。古。創。業。中。興。之。主。多。繇。布。衣。奮。虛。拳。以。取。天。下。非。吾。之。兵。民。財。用。而。吾。能。因。而。用。之。積。累。以。成。帝。王。之。業。詒。謀。子。孫。垂。裕。無。窮。今。兵。民。財。用。皆。祖。宗。之。所。以。遺。我。者。而。陛。下。不。思。所。以。用。之。遽。欲。委。身。束。手。受。制。於。仇。讐。之。手。此。臣。之。所。不。曉。也。陛。下。縱。自。輕。奈。宗。社。何。奈。天。下。臣。民。何。奈。後。世。史。冊。何。且。立。大。事。建。大。功。者。必。以。作。士。氣。得。人。心。爲。先。而。號。令。賞。罰。者。其。具。也。人。心。士。氣。在。今。日。雖。已。不。及。建。炎。之。初。然。審。號。令。明。賞。罰。以。振。起。之。尚。爲。我。用。陛。下。一。受。制。於。強。敵。號。令。賞。罰。皆。不。繇。已。出。

士氣日索。人心日離。將士益桀驁而不可馭。民庶益
泮渙而不可蓄。威令一去。如神龍之失水。爲蝼蟻所
困。後雖悔之。噬臍何及。此臣所以夙夜痛憤而寒心
也。議者必謂勢有強弱。弱者必服於強。故太王事狄。
勾踐事吳。孫權事魏。皆行權以濟大業。藉此以感動
聖意。臣皆以爲不然。昔者大王居邠。狄人侵之事之。
以珠玉犬馬。皆不得免。徙居岐山之下。從之者如歸
市。狄人乃已。今陛下能以此已金人之侵乎。勾踐身
入吳。以爲臣僕。僅得歸國。枕戈嘗膽。卒以報吳。今陛
下能以此報金人之仇乎。孫氏起於江東。未能自立。

故臣魏以俟時。今陛下藉祖宗二百年之基業。縱使未能恢復土宇。豈可不自愛重而怖懼屈服以貽天下後世之譏哉。爲此說者。但欲求合於朝廷之意。而不顧患禍之在後。臣愚竊以爲過矣。昔趙欲帝秦。魯仲連辭而折之。謂秦帝則諸侯皆爲所制。不聽命則誅戮隨之。欲帝秦者。知其利而不知其害。秦非禮義之國。仲連有蹈東海而死耳。不忍爲之民也。新垣衍誡不果。帝秦而秦師爲之退舍。曹操以十萬衆臨荊州。勢搖東南。雖張昭亦欲迎之。周瑜爲孫權畫策。謂如臣者。何往不可。將軍安所容乎。權拊案大悟。遂有

赤壁之戰。而弔足之勢成。此二人者。其所陳說。深切著明。二君聽之。遂能返禍爲福。轉敗爲功。胷中了了。明白洞達。果斷而不疑也。今虜使之來。其用事者。未必不以兵隨之。以爲脅制之術。顧朝廷所以措置者。如何耳。措置有備。雖符堅百萬之師。不足畏。措置無術。雖數千百騎。便足以爲吾擾。方危迫之秋。無排難解紛之畧。則無貴於智者。朝廷自十數年來。議論不一。執守不堅。無規模素定之計。玩歲愒日。苟且過時。無積累統緒之功。唱爲和議者紛紛。趣度目前。而不以後艱爲念。以致今日之陵侮。非偶然也。忠義之士。

懷才抱智。不能自達者。顧豈乏人。臣願陛下特留聖意。且勿輕許。深詔群臣。講明利害。可以長久之策。悉以上聞。陛下擇其善者而從之。廣聽兼慮。而不偏聽於今日事。必有所補。臣昨於建炎元年。嘗獻國是之說。謂朝廷不能自強自治。但欲卑屈以從之。雖至於奉藩稱臣。虜人之謀。勢猶未已。又於紹興五年。蒙降詔訪問。嘗獻乞罷議和之說。謂遣使議和。虜人必制我以必不敢爲之謀。邀我以必不可從之事。非徒無益。而有害於吾自治自強之計。爲患甚深。區區之忠。幸蒙睿察。今日之事。無它。遣使議和不已。使敵人得

窺伺謀畫。皆引惹之所致也。臣願陛下爲宗社大計。萬機之餘。長慮却顧。覽前古之興亡。究今日之利害。倘或權時之宜。稟其彌令之後。別有須索。如前所陳。或稟正朔。易服色。趣朝會。擅誅賞。盡取鞍馬噐甲之類。當如何處之。而吾之士氣旣索。如何可以復振。人心旣離。如何可以復收。國勢旣傾。如何可以復定。今日執和議主事者。果能任其責而保其必不然乎。遠察太王勾踐之事。與今日不同。深味仲連周瑜之言。與今日相若。則利害昭然矣。臣世受國恩。奉事三朝。蒙陛下知遇尤厚。常願奮不顧身。以徇國家之急。今

事勢危迫。所以應之一失機會。則禍難相尋。爲害有不可勝言者。又非前日之比。區區孤忠。願效愚計。第恐朝廷不能用之。夫用不用在朝廷。而臣激於義。有不得不言者。惟陛下留神幸察。臣竊觀國家之與金人。勢不兩立。而今日之事。止在於絕之與通。亦不難決也。與之通。則聽其號令。而臣屬之動爲所制。身危國蹇。必至於亡而後已。與之絕。則圖所以自治自強者。選將勵兵。待其來則禦之。勝負之勢。猶未定也。與其事不共戴天之仇。仰愧宗廟。俯失士民之心。而終歸於亡。貽羞無窮。曷若幡然改圖。正仇讐之名。辭順。

理直。以作士民之氣。猶可以履危而求安。轉凶而爲存。未爲失策也。二者利害相去遠甚。臣願陛下出自睿斷。正王倫誤國之罪。而肆諸市朝。使未入境。則卻而弗納。已入境。則拘留而勿遣。降哀痛罪已之詔。深咎前日和議之失。丁寧切至。以激勵天下臣民將士之心。盡取賂遺敵人金帛。以募敢死之士。訓練習服。以守邊疆。以備不虞。以制虜人衝突。此計既定。詔音既頒。臣將見人情翕然。回心易慮。天地神明亦當助順。強虜之師不戰而自屈矣。然後據江淮以爲固。進賢俊。退佞諛。修政事。明賞刑。治軍旅。積金穀。待時。

而奮以圖恢復。此豈可與受制於人甘心屈辱同。而語哉。且劉豫者。金人之所立。八九年間。豫之所以奉金人者可謂至矣。一旦廢棄。如弁髦土梗。何則。彼爲利謀。而初不以恩信爲事也。陛下視金人之於我。孰與豫。豫猶如此。於我可知。彼雖以江南數千里地。王我。猶不足信。而況復故境。歸侵疆乎。惟智者可與料敵。惟明者可與照姦。陛下或以臣言爲未然。願降臣章。與群臣之有智畧者。慮而圖之。勿爲單見之所惑。勿爲黠虜之所欺。勿至將來追悔不及。而後悔則宗社生靈之福也。傳曰。日中必昃。操刀必割。時平時

不再來。臣言可採。陛下斷而行之。勿疑。以爲議論乖
謬。而害於今日之至計。願先斧鉞之戮。以懲妄發。夫
主憂臣辱。主辱臣死。國家事勢至此。死何足惜。惟陛
下裁察。臣昨任江西安撫。制置大使。日因淮西酈瓊
之變。以已見利害具奏。以聞。誤蒙聖恩。降詔獎諭。以
疏中論及侍從臺諫。謂侍從者論思獻納之官。臺諫
者耳目腹心之寄。以言爲職。類皆毛舉細故。以塞責
所論不過簿書資格。守倖令丞除授之失當。至於國
家大計。係宗社之安危。生靈之休戚。初未聞有一言
及之者。犯臺諫之怒。厚誣醜詆。以無爲有。群起而攻。

之。伏蒙聖慈。洞照非辜。力賜保全。使得歸休山林。養
疴藏拙。臣之爲幸大矣。蒙垢忍辱。不敢自明。緘口結
舌。不敢復與世事。故芻蕘之言。久不上達。然惓惓之
心。未嘗一日不在赤墀之下也。今聞使事方亟。所係
國體。非輕存亡之端。非獨安危而已。臣不勝憤懣。敢
以狂瞽。干冒天聰。罪當萬死。俯伏俟命。

胡澹菴上高宗封事其言可謂切矣公此疏
尤爲沉痛澹菴諫臣也故多僨張之詞公大
臣也其爲慮周其愛君篤其言激而婉迫而
可思然澹菴封事膾炙人口久矣此疏祕五
百年至今日而始洩之真千古快事也
宋之興衰強弱一言而決在和使之通與絕
而已與之絕則正仇賊之名作士民之氣勵
兵選將可以轉危而爲安與之通則仰愧宗

廟俯愧士民身危國削必底于亾而後已夫
主和議者不過欲劉豫其君已耳豫今何如
何有于我雖欲求彼以江南數郡地王我不
可得而况欲迎還梓宮規復舊宇乎公之言
危痛至此而猶不悟噫羞惡之心人皆有之
然則孟子之言非歟

或使親迎梓宮或使單車入覲一段與魯仲
連折新垣衍之意同

王倫後爲金人所留欲以爲營平等州都轉
運使倫不從遂縊而死倫似非叛宋者然等
死耳倘能以死爭詔諭江南之名豈不爲中
國重計不出此乃與虜使偕來張虜焰而羞
中國後雖不爲虜用繼之以死猶不足以贖
其罪若倫者可謂不善處死者矣 又玄評

辭免知潭州第三奏狀

紹興九年

右臣伏蒙聖慈以臣具奏辭免新除知潭州兼荆湖
南路安撫大使特降詔書不允者仰戴天恩第深感

源臣聞人君知人而善任則足以成功人臣奉公而
匪懈則足以稱職各盡其道非相爲賜也臣以散材
遭逢休運蒙陛下起於罪戾閑廢之中付以方面兵
民之寄者屢矣德厚恩深每欲龜勉自竭以圖報萬
一而以迂疎之故無周身之術動致煩言溷瀆宸聽
卒不能有以少稱知遇之意此臣所以夙夜感歎而
不遑啓處也今者罷自江西爲日未久又蒙湔洗畀
以帥權雖陛下日月之光幽隱必燭而微臣螻蟻之
跡跼蹐靡容昔漢文帝聞季布賢召之旣而罷歸布
曰陛下以一人譽召臣以一人毀去臣恐天下有識

者。有以窺陛下也。顧臣區區之進退。如雙鳬乘鴈之
去來。何足少多。然數年間。亟奮亟躋上。累陛下知人
任使之明。實有繫於國體。況臣衰病日加。精力凋耗。
積以憂畏。心氣不寧。豈可復當上流重鎮之任。伏望
聖慈。察臣精誠。非敢飾說辭難。簡會臣累奏。追寢成
命。依舊外祠。以安愚分。臣不勝祈天望聖。激切屏營
之至。

謝免荆湖南路安撫大使兼知潭州依舊宮祠
表

籲天請命。方虞雷電之誅。稱物施仁。遽霑雨露之澤。

荷恩益腆。撫已增慚。

謝中

伏念臣少也過庭。嘗聞詩禮。

之訓。晚而遇主。濫陪宰輔之司。雖迂疎素乏。經世之遠。猷而周慎。常謹律身之小節。坐罹讒毀。皆出怨仇。馬援謗深。誰與辯明於蕙實。義之誓苦。但期終老於蘭亭。豈謂大君。未忘一介。起於閑地。付以名藩。而臣景迫桑榆。衰先蒲柳。憂畏甚矣。直類傷弓之禽。疲瘵繭然。久抱負薪之疾。既不獲龜勉以承命。又深懼稽遲之速辜。夙夜靡遑。進退維谷。念父母之於厥子。惟疾痛之爲憂。而天地之於群生。俾飛潛之各遂。力布繇中之懇。果蒙從欲之私。琳館優游。尚叨厚廩。海邦

深遠。仍許便居。此蓋伏遇皇帝陛下。體道宅心。用人
惟已。不違簪履之舊物。每賜記憐。尤矜樗櫟之散材。
曲加芘覆。致茲孤陋。亦獲保全。臣敢不克戒暮塗。益
修素履。甘山林之寂寞。一洗五十年之非。憑香火
之因緣。上祝億千萬歲之壽。

附建炎起居表

起居道君太上皇帝表

臣御名言。神京不守。坐失金湯。天施啓行。越在草莽。凡
居臣子之列。均深痛憤之情。臣某誠悲誠感。頓首頓
首。恭惟道君太上皇帝陛下。遊神穆清。宅心昭曠。法

堯舜之遜禪濟國家之艱難方交兩宮之歡永享四海之養鄰邦犯順戈戟暗於中原帝座移居鑾輿幸於朔野神人感憤華夏悲摧而臣濫總帥樞莫陪贊御迫羣臣再三之懇請謂大寶不可以久虛勉狗羣情嗣守神器瞻行宮而靡及慕慈訓以增懷輯睦師徒冀宗社之可保撫寧方夏佇車駕之言歸謹遣通直卽試太常少卿臣周望奉表起居以聞

起居孝慈淵聖皇帝表

臣御名言戎馬荐興環日畿而布列帝都不守致天步之艱難萬國悼心三靈失色臣某誠悲誠感頓首頓

首恭惟孝慈淵聖皇帝陛下。法禹湯之恭儉。體堯舜
之聰明。十載東宮。令德聞於海寓。踰年南面。仁政浹
于寰區。適當嗣位之初。兩致鄰邦之寇。割地增幣。以
生靈屈已。而講和。擐甲登陴。爲廟社忘身。而固守。金
湯失險。羽衛啓行。致翠華之蒙塵。瞻紫微而移座。華
夏失庇。神人疇依。而臣叨揔師徒。莫陪羈勒。迫羣臣
之懇請。嗣大寶以撫臨。仰遵勤儉之風。庶格中和之
治。傷心北望。緬懷異域。而增悲整。駕南還。尚冀敵人
之悔禍。謹遣通直郎試太常少卿臣傅雱。奉表起居
以聞。二表不激。不阿。使人悲痛。

宋李忠定公奏議附錄卷之十五

明

皖桐左光先羅生選

宋 李綱伯紀著

筠陽戴國士初士較

宗裔李嗣玄評定

公移

與宰相論捍賊劄子

綱伏覩進奏院報三省樞密院同奉聖旨採報敵人
窺伺承楚如別有警急當親總六師以臨大江綱於
十月二十二日已曾具奏以今日捍禦賊馬事勢陳

李忠定公奏議

卷之十五

一

獻三策、自福州入急遞投進、今來又覩進奏院報韓
世忠統全軍於承楚間、迎擊賊兵、連獲勝捷、有旨分
遣臺臣、督劉光世、張浚、統兵渡江、應援、車駕已起發、
進臨江上、撫勞諸軍、竊惟朝廷當危急艱難之秋、爲
宗社生靈之計、建大議、決大策、不貳不疑、毅然親征、
將士用命、捷音系路、廟謨克壯、虜勢退屈、誠可爲天
下大慶、然賊情狡獪、戎事方棘、機會之來、間不容髮、
綱輒敢竭其愚慮、陳十事以獻、伏望鈞慈、特賜詳覽、
有可以裨廟筭之萬一者、願施行之、勿以人廢言、不
勝幸甚、

一宜防備生兵、綱竊觀僞齊劉豫、招誘叛將、驅河

北河東陝西之民、挾帶虜騎、侵擾淮甸、聚糧饒

久、

傳聞僞齊聚糧於淮陽宿遷縣其久爲入寇之計非一朝一夕

入寇亦早

往年

虜騎南牧多以春冬之交今僞齊以冬初入寇比之往年爲早

倏然有窺伺

江左之意、今旣王師屢捷、挫其銳氣、勢必遲留

境上、乞師金人、萬一有重兵繼來、我以疲乏之

兵、當新羈之馬、則將何以取勝、宜命諸將蓄養

銳卒、更進迭休、使有餘力以待之、又於諸路摘

那精銳軍馬、以爲濟師之計、庶幾可以捍禦

一宜防備海道、綱竊聞僞齊劉豫、於登萊等州、多

造海舟、又於楚海等處、擄掠客旅舟船、其用意
非淺也、方冬月風便之時、勢須驅使山東之人、
自海道犯浙東一帶濱海州縣、則吾腹內之民
擾矣、然自海道來者、必皆步人、實不足畏、朝廷
旣遣兵將、分屯明越、以備不虞、而沿海州縣、巡
尉弓兵、數不爲少、合之則勢強、分之則勢弱、宜
命帥司、并提刑司、團結成軍、於要害地、擺布控
扼。又募海上土豪、自備舟船、巡綽捍禦。許以將
來事定、重與推賞。不爲無補。

一宜防備上流、綱竊觀自昔侵犯東南、未有不繇

上流者、舳舻相接、順流乘風、自川江而下、日數
百里、不旬月間、可至江浙、故上流之地、自吳及
東晉以來、必屯重兵、乃可保國、今歸峽荆南岳
鄂九江一帶、雖無他虞、然屯兵不多、所幸襄漢
復爲我有、上流形勢、倚之爲重、襟帶荆蜀、控引
江淮、下瞰畿甸、真形勝必爭之地也、宜命大帥
統重兵以鎮襄陽、則上流有屏蔽之勢、江浙可
以奠枕、中原有恢復之兆、畿甸可以俯窺、此最
今日之上策、惟廟謨熟計之

一宜防備四川、綱竊觀金人累年侵犯四川、其意

盖以蜀中富庶、欲必得而後已、所幸山川險固、將士用命、僅能保守、今賊馬南牧、擾我淮甸、安知不別遣重兵、窺伺川峽、道里遼遠、號令難通、都督旣已不行、兩宣撫不相節制、邈然一方、深可憂慮、宜命信臣早臨撫之、布宣威德、不失機會、庶幾四川生靈有所依怙、國勢賴之以安、非細故也、

一宜保據淮南、綱竊聞金人中間通使、屢有畫江之言、盖爲劉豫之計、今賊馬南牧、雖未必敢窺江左、其意決欲盡得淮南、深慮兵交、使在其間、

復有畫江之請、朝廷欲舒目前之急、或遂許之、則大事去矣。淮南者、江南之屏蔽也。六朝所以能保有江左者、以強兵巨鎮、所以爲藩籬者、盡在淮南。故以魏武之雄、符堅石勒之衆、宇文拓跋之盛、卒不能窺江表。後唐李氏有淮南、則可以都金陵。其後淮南爲周世宗所取、遂以削弱。此必至之理也。萬一有畫江之請、慎不可許。宜命諸將協力擊賊、使之退遯。將來措置淮南、當於兩路置兩大帥以臨之。東路揚州爲帥府、屯重兵爲根本之地。分遣兵將進守楚海濠泗壽。

春淮陽沿淮一帶諸郡。小築城壘。如開新邊。其
初朝廷應副錢糧。徐議營田。使自贍養。遇有賊
馬。則大帥遣兵應援。稍能自守。乃可召人歸業。
漸次葺理。假以歲月。而藩籬成矣。前有藩籬之
固。後有大江之險。然後可以立國。而議攻討之
策。近年以來。大將握重兵於江南。官吏守空城
於江北。雖有天險。初無戰艦水軍之備。不幾於
倒置而虛設乎。願廟堂熟計之。

一宜調和諸將。綱竊聞師克在和。不在衆。將帥不
和。而能成功者。未之有也。武人之性。剛果。有毗

睚之失、必相怨憤、而激以忠義、則徃徃復合、其性然也。郭子儀、李光弼、同在朔方、未嘗合堂同席而坐。一聞祿山之變、子儀中分麾下、與光弼勉之立功。何則、先國家之急、而不以私害公也。賈復、寇恂、不相能。光武解之曰、天下未定、兩虎安得私鬪。朕爲分之。於是並坐極歡。共車同出。結友而去。今朝廷所賴以爲爪牙者、三大將也。平居無事之時、人情豈無纖芥。今當朝廷艱危之秋、使之各渡江以相應援、則當以調和爲先。宜贊淵衷、降宸翰、遣近臣推明古之將帥、徇

先見

國家之急。而忘私忿之意。勉以忠義。使之歡然。犄角立功。則賊雖衆多。不難破也。願廟堂留意。

越一年遂有酈瓊王德之隙而瓊竟叛去

一宜增置禁衛。綱竊觀自古人主。必有親兵。所以制障表裏。爲長慮卻顧之術也。祖宗禁衛之兵。總之三衙。其制甚備。自經變故以來。人數浸少。止以將兵爲衛。非強本弱枝之策。今將兵旣遣渡江。宿衛單寡。何以鎮服中外。倉卒召募。固難得人。謂當有術以權之。竊見近降指揮。復置鄧營使司。宜因此時。號召諸路統制官之有名望。

者、使率其部曲、充御營使司使喚、更不隸屬諸
大將下、使軍容奮張、國勢益隆、誠今日之先務
也、

一宜廣備糧食、綱竊謂用兵以糧食爲急、糧食以
飛輓爲難、今賊兵擾吾淮甸、將士捍禦、勢或持
久、則糧食不可不廣爲之備、訪聞湖南米斛百
錢、江南東西、歲亦豐稔、朝廷近者增置漕臣、宜
命江湖廣行收糴、措置舟船、順流而下、儲蓄於
建康鎮江、轉漕淮甸、以給諸軍、庶幾倉卒無乏
絕之患、若止仰常賦、深恐緩急不免科湏、米價

翔踴民力重困、惟廟堂圖之、

一宜措置戰艦水軍、綱竊觀大江限制南北、實爲天險、然必以人力加之、險乃可恃、魏武親臨瓜步、孫權以舟師拒之、見旌旗戈甲之盛、歎曰、生子當如孫仲謀、權告以春水方生、疾癘將作、操乃還、其後曹丕南伐、見波浪洶湧、吳師有備、亦曰、彼有人焉、未可圖也、遂班師、繇是觀之、據長江之險、擇要害之地、置戰艦水軍、使形勢相接、金鼓之聲相聞、敵人雖有百萬之師、豈敢輕犯哉、何則、彼爲濟渡之謀、而我有攻擊之具、主客

之勢、既不相侔、北人所習、又非其利、真東南形
勝、保國之要術也、今國家權寓江左、而累年以
來、不聞措置設險之策、使敵人得以窺伺、玩歲
愒日、於閒暇無事之時、遑遽震恐、於倉卒擾攘
之際、有險而不議、所以守之者、可以爲而不爲、
真可惜也、荆湖間車船、乃唐嗣曹王臯遺制、其
大有至三四十車者、挾以雙輪、鼓蹈而進、駛於
陣馬、又仁宗朝、修武經總要、該載古今戰艦之
制甚備、願命荆湖、頒降式樣、於沿江諸州、使之
製造、召募水軍、統以將佐、逐時閱習、可以爲長

久之利、非特應一時之急而已、天下無不可爲之事、勿謂緩不及事、而遂置之、天下幸甚、

一宜措置楊么、綱昨任荆廣宣撫使日、招捕群盜數萬人、惟湖北賊楊么、據重湖之險、非有戰艦水軍、未可攻討、嘗具楊么本末、申奏、謂此賊不可輕、是時朝廷已罷荆廣宣撫司、特降指揮、令綱節制湖北荆南、同共進討、方措置間、綱蒙恩罷任、朝廷委制置使王玠、同兩路帥臣措置、迨今未聞殄平、勢頗猖獗、盖此賊非陸地群盜之比、據重湖、環千餘里、出沒不常、其徒皆舟人漁

子、便於操舟、又有潰散兵卒、竄其間、以教之戰、
我師深入、欲速成功、則徃徃不利、屯聚持久、則
錢糧之費不貲、今又淮甸警急、朝廷不免摘那
兵將、則此賊之勢、又復鴟張、未有掃蕩之期、爲
吾牽制、非細故也、宜命兩路帥臣、謹重未須深
入、俟其抄掠、則隨宜擊之、分兵屯瀕湖諸邑、使
之不得侵漁種植、以絕其糧、明出文勝、揭近上
首領姓名、重賞捕之、許其徒中自相殺併、以携
其黨與之心、賊必漸困、然後可圖、兵以緩爲速、
如趙充國之討先零是也、今其徒旣衆、必示以

生路、乃可使之解散、而取酋首、必欲盡滅、以堅其從賊之志、非策之得也、惟廟堂裁處、

必示以生路、乃可使之解散、必臨以兵威、乃可使之自歸、

與右相條具事宜劄子 右相張德遠浚也

綱竊以主上躬睿智神武之姿、有知人之明、所以待遇相公、仰成恢復之業者、信任之專、古所未有、相公蘊王佐之才、有不世出之畧、被受眷知、願捐軀以殉國者、精忠之誠、遠追古人、憤強虜之憑陵、耻逆臣之僭竊、悼二聖鑾輿之未還、憫中原生靈之塗炭、深謀遠慮、圖此武功、此固十數年來、天下士民之所俟望、

者也、然而適當旱暵之餘、財用匱乏、民力凋瘵、不取於民、則調度不足、取之過甚、則人心驚疑、正在斟酌損益之間、使軍不乏興、民不告病、乃爲得策、輒殫淺短之慮、庶幾萬一之得、以裨廟筭、伏望鈞慈、特賜采擇、謹具下項、

一 綱昨過衢州、竊見都督行府劄子、頒降官告、勸誘上戶、進納文臣自宣教郎至迪功郎、武臣自修武郎至承信郎、價直各有等差、計錢六十一萬貫、內宣教郎六萬貫、迪功郎一萬、其餘升降各以萬五千貫爲率、契勘自來進納文臣止於

判司簿尉、遇有功改官、卽轉入右列、蓋所以清流品、重名器也、今以京朝官、許之進納、恐失本意、又上戶之家、雖有物力、安能目前具六萬緡以買一官、若分科衆戶、則此官當使誰受、綱謂不若以一宣教郎、分爲六迪功郎、倣此以行、則上戶易於出財、人情樂於入仕、州縣勸誘、不至費力、又無輕名器之患、就不得已之中、此爲長策、仍於諸郡、量減分数、庶幾不至竭澤、易於趨辦、伏望鈞慈、更賜裁處、

一轉移之間、便成妙用、勸誘易從而名器不濫

一綱契勘本路人戶、合納今年夏稅、和買物帛、朝

延元降指揮、立定分數、從第四等已下、折納價銀、依自來條限起催、蓋優饒下戶、易於催納、今承都轉運司公文、准尚書省劄子、勘會本路合發折帛錢、元責限三月椿足、欲督責兩漕臣拘催、日下並要起發盡絕、奉聖旨、依仍展十日、若依所展日限、合至四月十日了足、今來正是蠶麥未熟、新陳不交之時、本路洪吉筠、袁江撫州、興國臨江軍、皆係災傷至重、其第四等已下人戶、多是官中見行抄劄賑濟之人、難以預行催納、如州縣逐急於上戶催科、將來下戶、卻合入

納本色、顯是重困、除已申奏朝廷、乞將本路災
傷州縣合起折帛錢、依條限催納、其餘州縣自
依今來立限指揮、庶幾災傷下戶、得被實惠、不
致逃亡、更望鈞慈、特賜照察、

一綱竊見諸路應副岳飛錢米、並津般至郢州交
卸、勢湏先有重兵屯駐、及修蓋倉庫、安頓去處
又自漢沔至郢州、千有餘里、密邇僞境、須得軍
馬防護、粮道乃可無虞、綱竊以謂不若且於鄂
州樁管、候將來大軍進發、沿漢江有備、乃可旋
次措置、津般實爲得策、更望鈞慈、特賜裁處、

一綱竊見自軍興以來、取於民者非一、降官告給
度牒、賣戶帖、理積欠、折帛博糴、預借和買、名色
甚多、當此旱災之餘、民力已困、誠願朝廷講求
理財之道、救弊覈實、開闔貿遷、使不斂於民而
用度足、乃爲長久之計、伏望鈞慈、特賜垂念、

一綱近因入劄子、論兵家利害、妄意朝廷措置有
未盡善者五、宜預備者三、當善後者二、議論迂
疎、誠不足裨補廟謨之萬一、姑盡其拳拳之忠
而已、輒錄副本拜呈、伏望鈞慈、特賜詳覽、

與李尚書措置畫一劄子

李尚書諱光代公爲
江西安撫使

綱竊觀六朝於上流重地必擇名臣爲之帥守使自爲家計乃能鎮撫一方屏翰王室皆有實效不事虛文私竊慕之故自到豫章以來修築城池爲可守計創置營房使兵民不相雜處繕治器甲修造官府倉庫措置財賦蓄積金穀團結軍伍招捕盜賊皆幸稍就緒庶幾古人之萬一少副朝廷委任之意今具下項

一修築城池

洪州城池北面尤爲闊遠皆係荒閑田地無人
居止又城外一帶盡是漲沙高與城齊可以下

瞰城中、若欲爲可守之計、其勢不得不修治、以
朝廷有蹙減指揮、具奏條陳利害、且乞給降空
名告勅等、得旨給空名告勅五萬貫、自去年收
買木植、燒變磚甃等、至今春興工止、是本州廂
軍壯城、及他州剗刷到兵卒、共五百餘人、漸次
修築、至夏末秋初、方借寺觀莊夫、以助工役、日
給錢米、月有犒設、皆大使司辦給、並不支用漕
司經費、至十一月半畢工、爲城七百二十丈、壕
與城等、爲樓櫓一百二十餘座、計七百餘間、爲
城門十有一所、計三十餘間、器具、皮籬、砲座等、

并舊城皆一新、未嘗調發民戶一夫、無顆粒分
文、歛於民者、用新磚百二十餘萬口、皆自置窯
燒變、及令窯戶高價攬撲、皆有數在工房可稽
攷也。泰發到豫章日、願一登新城、按視及登舊
城、以望漲沙、方見裁減利害之不謬。泰發卽李
光字也

一 創置營房

洪州自兵火之後、營房並無存者、廂禁軍與民
雜處、不可鈐束、兼得朝廷指揮、每歲防秋、許勾
抽本路隸將、不隸將兵、按閱使喚、亦無寺觀屋
宇、可以屯泊、不免建置營屋、大使司支錢、與諸

州收買木植、及令諸縣根括戶絕、拋棄屋宇、拆移改造、置營房三千餘間、並係瓦屋、除撥付本州廂禁軍逐營外、造各軍營房一所、五百餘間、見今屯泊諸州、及步諒軍馬、使司工房、及洪州公案、皆有圖籍具在、可稽考也。

一 繕治器甲

大使司元降畫一撥兵二萬人、自近年以來、並撥付都督行府、及岳飛下、去年春、乃無一人一騎留者、併與器甲軍湏、一切席卷而去、綱去歲到官、簡視甲仗庫、空空如也、因奏朝廷、乞降告

勅以漸製造、督責兩作院、嚴其課程、又分委諸州製造、逮今已積三千餘副、金鼓旗幟、弓弩刀槍之類、率皆新置、又以格式造戰船、戰車、三勝弓、合蟬弩等、皆有名色數目、在工房、願泰發因暇日、試閱視之、

一建置官府倉廩

洪州素無吏舍、止以設廳前廊屋爲之、難以簡察、因規度都廳之南、造吏院三十間、以居群吏、卻以設廳前舊吏舍、分置甲仗、激賞營田、儀從添賜等庫、下馬門外、舊皆草屋、爲造房廊數十

間、收其直、歸公使庫、州學舊未全備、爲增修兩
廊、齋舍等、五十餘間、大豐倉、自兵火後、全無屋
宇、爲造新廩八座、計四十餘間、以貯大使司、并
常平司米斛、前此並無教閱之所、爲造新兵射
廳、及閱武堂、防城器具之類、不可無安頓去處、
爲造東南壁、及西北壁、防城庫兩所、共四十間、
無館賓客之所、爲置侯參謀宅、以充行衙、見今
照路分居止、皆有數目在工房、

一措置財賦

洪州前此財賦所以匱乏者、非惟以年凶民貧、

用度廣之故不治其源使之然也諸縣者財賦之源置而不問每遇緩急窘迫之際乃召縣令使之甘認應副豈非倒置乎綱自到任將諸縣合納窠名錢一切根剝見名色將本縣合支用之數分撥窠名存留應副外自餘并諸司錢物並令解州次月五日前到違限者治之又每季因通判行縣委之剗剗以此源源而來不絕官吏軍民請受並按月排口支給軍衣之類亦前期椿辦不闕月椿錢最爲難辦本州應副岳飛月六千餘緡田邦直月一千二百餘緡養申世

景兵月九千餘緡、凡一萬六千餘緡、此皆的確、不可闕者、今月椿庫、常有二三萬緡見管、蓋緣中間、力申朝廷、理會減免、每月折帛錢三千餘貫、及撥到發運司二分錢、及朱墨勘合錢等、所以粗有贏餘、又每差使司回易官、載米斛前去湖北、回易兌撥、應副岳飛軍中、既有利息、又省脚費、此不可不知也、綱去歲初到官、日大寧倉米、止有四石六斗、軍資庫錢、止有二百餘貫、今錢貫米數、頗多於前日、春衣錢亦已椿下二萬貫、幸取倉卒都曆、及稟支曆、試閱視之、

一蓄積金穀

使司金穀頗有積蓄、未嘗有毫髮歛取於民者、皆係措置回易、均節用度、收拾失陷所致、近交割與權官錢、約計七十餘萬緡、米計八萬餘石、州縣之數不在是也、亦嘗具數申奏朝廷、近聞有金字牌撥錢二十萬緡、銀二十萬兩、金三百兩、赴江州樁管、聽候朝廷指揮、取此猶可、若再取卽不堪命矣、所以積蓄得此錢米者、蓋緣每每力申明朝廷、若一切委隨、則掃地皆盡矣、於中米尤可惜、去歲初到、升百三十、秋得一稔、升

十數文、寸積銖累、以及此數、若不妄散、以陳易
新、可以常爲洪州之根本、非細事也、洪州歲用
米八萬餘石、而所得耗米、止及其半、何以支吾、
此亦須有以處之、方欲申明、洪州聚三司官吏、
數倍他州、而所得耗米絕少、何以能給、謂如安
撫司、漕司、吏自當責辦一路、宜於吉撫等州耗
米多處、約度應副、乃爲長久之策、更在裁度也、
一團結軍伍

大使司初有兵二萬人、至去年春、尚有數千人、
朝廷撥與岳飛、遂無一人一騎留者、綱自行在

乞得申世景軍將帶前來、纔及千人、其後累乞兵于朝廷、止是關送都督行府、及乞兵于都督行府、報云、候有警急日、遣發、然竟無一人一騎來者、旣而有淮上之捷、僥倖少安、自今年春、以盜賊紛擾之故、屢次申陳、蒙朝廷差到李貴步諒軍馬、各千餘人、今秋並勾赴本司教閱、以申世景將本軍爲前軍、賈和仲將諸州起發隸將不隸將兵、爲左軍、任仕安將洪州禁軍、爲中軍、李貴步諒各將本部兵、爲右軍、後軍、共六千餘人、團結教閱、軍聲粗振、然其間如申世景、李貴

步諒之軍多西北人、差可用、如本州及諸州兵、但可張聲勢耳、此五統制者、皆一時之選、更有以駕馭激勸之也

一招捕盜賊

本路盜賊、屢爲最、吉撫筠袁次之、去年到任之初、遠方人、但聞遣一前宰相爲大使、意謂統兵必多、徃徃戢服、其後屢守孫佑、邀功生事、致屢寇已受招安者、蠭起、幾破吉州、賴本司遣兵襲逐破之、復歸巢穴、然所遣不過數百人、群盜窺見鮮少、遞相讐學、紛紛不已、延及撫吉筠袁亦

有竊發者、所幸將上用命、招捕一火了當、又措置一火、方漸衰息、至秋初、得張柔直來守虔州、相與商議措置、又得朝廷差李貴步諒兩軍前來、渠魁如周十隆、謝小鬼等、悉就招撫、如劉宣、熊定、李安靜等、悉就擒捕、凡招捕過群盜六十餘火、其間每火有至數千人者、皆有人數姓名、在刑房、亦嘗開具申奏、今一路盜賊有名字者、者悉已淨盡、大抵江西民俗獷悍、輕生喜亂、有仇殺之風、全在巡尉得人、於其微時、用心緝捕、無使滋蔓、則亦不能爲大害也、要當使之服業、

田畝而無科湏之擾、廼爲上策耳、

前件八事、謾以免聞、亦舊令尹之政、必以告新令尹之意、幸冀照察、

公每當一任、雖倥偬掣肘之時、無不爲經久之計、不特爲洪州造福而已、公初到洪州時、錢糧軍馬器甲缺乏、如此一歲之內、掃蕩虔吉羣寇、修集城池、宜愈加缺乏、乃錢米充牣至此、豈有神鬼輸運、不過一念忠誠、遂筭無遺策、乃使公不安其位而去、宋事尚可爲邪、

申省措置酌情、處斷招降盜賊狀

契勘官軍、自來討捕盜賊、有招降、有脅降、雖同謂之降、而事體全然不同、或聚集徒衆、官軍未易敗獲、或保固險阻、官軍難以攻取、遣人齎發旗牒、入賊說諭、

供狀欵伏、聽從號令、解釋器甲、束縛槍杖、依限出參、有悔過自新之意、此招降也、招降則當免放從前罪犯、一切不問、首領量補官資、徒黨揀選使喚、待之與諸軍一等、若或官軍已臨賊陣、決可擒獲、及與官軍已入賊巢、逃避無所、乃始祈求乞降、保全性命、出於事不獲已、此脅降也、脅降則當以便宜酌情處斷、其有久爲頭首、累受招安、長惡不悛、及殺人衆多、情理巨蠹之人、自合依舊處死、及有隨隊劫掠、不曾殺傷之人、合從斷配、若是驅虜入隊、爲賊負荷、不曾劫掠作過之人、合從釋放、上項脅降、卽難與招降一例放

免。今來本路從前脅降到賊、並不分別、遂致兇徒無所懲戒。方其嘯聚徒黨、初謀作過之時、已謂官中必須招安、可無後患。恣情刼掠、無所忌憚。及至官軍圍掩、不能自免。又使出降、給據放散、安然無事。至有朝受公據、散歸田里、暮持槍杖、放火殺人、遂致兇徒遞相倣倣。一火纔了、一火又生、無有窮已。本司今將近來討捕到、賴漏八揚三十四熊清李安淨等諸項賊火徒黨、內有脅降之人、用所得便宜指揮、依前項措置、酌情處斷外、伏乞更賜詳酌、如得允當、卽乞指揮行下、見有盜賊、諸路帥府、悉依施行、庶幾事歸一體。

盜賊有所懲戒、漸見衰息、

申督府密院相度措置虔州盜賊狀

七月十八日、准樞密院、七月一日劄子、臣寮上言、臣竊以虔州地險民貧、風俗獷悍、居無事時、群出持兵、私販爲業、自軍興以來、嘯聚爲盜、招捕殆將十稔、終未殄滅、臣深求其故、乃知招安之後、田業荒蕪、耕種不具、州縣救目前之急、不暇存恤、又督逋負、宿惡乘之、相煽愈固、加以巢穴深遠、山多瘴癘、官軍憚於窮討、有司疲於供億、徃徃以招安爲便、殊不知官其首領、餘衆何歸、朝廷若不嚴行措置、異時鄰境、悉應相

率從賊。患益滋矣。臣愚過計。欲乞汀州常屯兵千人。循梅州各屯千人。虔州屯二千人。間歲更番。每遇猖獗。併力掩殺。仍擇守令。專意撫存。失業之人。如此。則良民有以自存。頑民知所畏憚。庶幾兵可彊而寇可銷矣。俟其平定。瑞金乃諸邑上流。增以軍使之額。邑宰兼之。留屯千人。委帥司撥差本州將兵四百人。他州六百人。陰防其微。選驍將主之。庶制其命。俾不復萌意。實永遠之利也。取進止。奉聖旨。令李綱連南夫張致遠。相度申樞密院。劄送綱。疾速施行。綱契勘虔賊舊年止。是冬月農隙之時。相率持杖。往廣東販鹽。

以圖厚利、後來漸次、於循梅等州村落間、刼掠得牛
畜錢帛、歸家使用、巡尉不敢誰何、徒黨漸衆、遂犯州
縣、至建炎四年、官省移在虔州、陳大五長嘯聚作過、
當時官司措置無策、賞罰失當、土豪有物力之家、往
徃嘯聚結集、報復讐怨、頭項漸多、州縣不能制禦、連
結滋蔓、以至今日、雖遇豐年、亦不衰息、其說有二、一
則虔民賦性獷悍、喜於爲盜、易爲結集、動以千百爲
群、互相刼掠、凌逼州縣、不畏刑法、不顧死亾、循習成
風、不以爲怪、異於諸路盜賊、二則自近年以來、專務
招安、官司失於措置、有以誘之爲盜、謂如招安到賊

火首領、盡補官資、放散徒黨、其徒黨中桀黠者、又復糾集徒衆、自爲頭首、以俟招安、復得名目、遞相倣倣、無有窮已、其招安出首領、雖已補授官資、或與差遣多是不離巢穴、不出公參、依舊安居鄉土、稍不如意、或資用闕乏、則又相率爲盜、以此滋蔓、雖痛遭屠戮、亦不改悔、竊恐爲患未艾、今來朝廷欲措置虔寇、不過招捕兩事、臨以重兵、有以制其死命、然後可以招撫、務令措置合宜、乃爲得策、何謂臨以重兵、有以制其死命、今虔寇巢穴多在江西、福建、廣東三路界首、置立寨柵、爲三窟之計、一處有兵、則散往他處、官軍

旣退、則又復團聚、中間遣發軍馬、卒於不能窮討、正以節制不一之故、若節制歸一、使其不能散逸、且捕且招、威令旣行、則窮寇別無他策、必須自歸、然後結以恩信、使之改過自新、將爲首及徒黨桀黠之人、盡赴軍前使用、以除後患、此最策之上者、綱昨曾陳情乞於江西路置都統制一員、節制三路軍馬、以招捕虔賊、蒙朝廷許令本司辟置、然至今未敢辟者、非惟難得其人、亦以本路軍馬單弱、不足以副都統制之名、故遲留至今、如蒙朝廷遣發防秋軍馬、使本路兵勢稍壯、方可辟官、充上件差遣、使統三路之兵、以措

置虔寇、數月之間、必見就緒、旣以兵力招降、乃可使
之遠去巢穴、以消永久之患、應招安到賊火、除放散
脅從羸弱之人外、其頭首及強壯桀黠之人、並令解
發赴軍前、使喚頭首與補正官資、及其餘強壯人、並
與刺手背、分隸諸軍下、使喚若能立功、優與旌
賞、或又作過、必殺無赦、其不能悛改、逃亡復歸本土
之人、許諸色人捕斬、籍沒田產、編配妻子、以係累其
心、使知爲盜之無益、自然不敢復爲頭首、則虔人喜
爲盜之風、漸次可銷、昨韓世忠旣破范汝爲、其頭首
及強壯人、並將帶隨軍前去、所以建州數年、無盜賊

此尤要着
善後之策
云踰于此

之虞者。正以措置得宜。至於盜賊衰息之後。又須縣令得人。勞心撫字。使作過桀黠之人。既去。良民得以復業。安於田畝。乃可以化盜區。復爲樂土。此尤不可後也。綱昨嘗奏請辟置虔州縣令。已得指揮許辟。然至今猶未敢辟奏者。實以虔之諸縣。多是瘴煙之地。盜賊出沒。不常。朝廷初無賞格。士大夫之有材者。多不願就。又難強之使行。今吏部注授者。既不肯赶上。見任者。又皆欲省罷。欲其究心職事。撫字遠民。消革盜賊之風。未易可致。欲望朝廷優立賞格。將來辟置知縣。到任半年。盜賊消除。良民復業。選人特與改官。

京朝官、與轉行一官、候任滿日、各再與轉一官、其盜賊平定之後、量與蠲免租稅、已前欠戶、並免催科、庶幾官吏盡心、民庶安業、復有承平之象、所有乞將虔州屬邑、分置軍壘屯兵一節、見行相度、別具供申外、謹具申樞密院都督行府、伏候指揮、

虔寇偏近吾鄉、至今爲梗、存此使弭變者、采焉、是亦公無窮之澤也、

李又玄評

申督府密院開具、浚江州縣合控、扼虔乞軍馬

防守狀

契勘本路、西接湖北、東連江東、北與淮南對境、去偽地不遠、浚江州縣、渡口險隘、去處自來防秋、皆合行

措置控扼、前此數年、本司蒙朝廷撥到兵二萬人、可
以分布使用、如江州興國軍、皆屯重兵、武寧分寧諸
邑、亦有軍馬、近日兵將盡皆撥隸都督行府、及岳少
保軍中、所存無二十分之一、今來秋氣已深、應合控
扼之處、並無兵可以防守、雖朝廷遣兵屯戍淮上、可
以保障、然預備不虞、兵家常理、亦本路近年舊例、不
可頓闕、若沿江三州軍有兵可守、緩急別無他虞、則
其餘州縣皆可保全、所有防守、雖合用兵數至多、今
來止望朝廷依累降指揮、量行差撥五七千人、奉司
隨宜處置、庶幾不致闕事、今將沿江州縣渡口、及險

隘合行屯兵控扼之處畫圖帖說繳申朝廷都督行
府乞賜指揮差撥應副施行今開具下項

一沿江合控扼州軍

洪州

江州

興國軍

一沿江控扼縣分

洪州武寧縣

洪州分寧縣

江州瑞昌彭澤縣

江州湖口縣

興國軍通山縣

興國軍大冶縣

一合控扼險隘

武寧縣界狗咬口

瑞昌縣界泉口

一合控扼渡口

李家渡 馬家渡 富池口 洪雪洲

磁湖

右謹具申樞密院都督行府伏候指揮

今流寇猖獗于豫楚之間江西防扼不可不
周存此足以周知阨塞而爲之備亦固圉之
急務也

李又玄評

